



## Aningaasanut Nunanullu Allanut Naalakkersuisoq

### **Aningaasaqarnermut Ataatsimiititaliap suliassaq nr. 01.31.06/06-00201 pillugu pingasunngornermi ulloq 6. december 2006-imi aalajangiinera pillugu Naalakkersuisunut ilisimatitsineq.**

(Naalakkersuisut ulloq 20. oktober 2006-imi aalajangiineranni imm. 2a)

**Kontomi pingaarnermi 84.40.17-mi, Meeqqanik inuusuttunillu paaqqinnittarfinnut tunngasumi, Attumi ukiumikkut akuleriinnut paaqqinnittarfiup inaarsarneqarnissaanut atugassanngortitsinissaq.**

#### Naalakkersuisut **inassutigaa**

- kontomi pingaarnermi 80.00.00-imi, Sanaartornermut atugassanut agguanneqanngitsunut tunngasumi, aningaasaliissutit 1.555.000 kr.-inik ikilineqassasut.
- kontomi pingaarnermi 84.40.17-imi, Meeqqanik inuusuttunillu paaqqinnittarfinnut tunngasumi, suliassaq nr. 092.41.044-mut, Attumi ukiumikkut akuleriinnut paaqqinnittarfiup inaarsarneqarnissaanut tunngasumut, , aningaasaliissutit 1.555.000 kr.-inik amerlineqassasut

#### **Aningaasaqarnermut Ataatsimiititaliap oqaaseqaatai**

Apeqqutit arlallit Naalakkersuisunit akissuteqarfigineqarnissaat siunertaralugu suliami matumani aalajangiinissani Aningaasaqarnermut Ataatsimiititaliap ulloq 7. november 2006-imi ataatsimiinnermi nr. 63-imi kinguartippaa.

Ataatsimiititaliap apeqqutai 24. november 2006-imi allakkatigut Naalakkersuisut akissuteqarfigaat.

Naalakkersuisut akissuteqaataat tunngavigalugit qinnuteqaammut tunngatillugu ilaatigut makku ajornartorsiuteqarfiusut Aningaasaqarnermut Ataatsimiititaliamit oqaatigineqassaaq:

- a. Sanaartugassatut suliassatut qinnuteqaatigineqartup suliassaq Aningaasaqarnermut Ataatsimiititaliamit 2003-mi itigartitsissutigineqartoq (Aningaasaqarnermut Ataatsimiititaliap suliassaq nr. 03/01.36.02.06-47) assigerluinnarpaa, tak. ataatsimiititaliap 7. november 2006-imi aalajangiinera.
- b. Aningaasat qinnuteqaatigineqartut 2006-imi atorneqarsinnaanerit qulakkeerneqarsinnaanngilaq. Ukiup taamaalinerani taama kingusitsigisukkat ajornartorsiut taanna pingaaruteqarunnaartoq kukkusumik isumaqartoqarsinnaavoq, aningaasammi Sanaartugassanut Iluarsagassanullu Aningaasaateqarfimmut ilineqartussaammata.

Missingersuusionermit malittarisassami 2002-meersumi Naalakkersuisunit aalajangersarneqartumi aalajangersakkat (immikkoortoq 4.4, 8.5.1 aamma 8.5.8)

naapertorlugit sanaartornermut tunngasuni missingersuusiornermi sanaartornermut aningaasaliissutinik atuinissap piviusorsior tumik missingersuusiorneqarsimanissaa pingaarnertut tunngaviuvoq.

Assersuutigalugu sanaartugassatut suliassamut, sapinngisamik pitsaanerpaamik naliliineq tunngavigalugu, ukiut pingasut ingerlanerini ingerlanneqartussatut naatsorsuutigineqartussamut tunngatillugu tamanna ima isumaqarpoq sanaartugassatut suliassamut aningaasaliissutit pisariaqartut (= suliassamut tamakkiisumik aningaasartuutit tamarmiusut) ukiunut taakkununga pingasunut agguataarneqarsimanissaat, tamannalu pissasoq ukiuni ataasiakkaani taakkunani aningaasat atugassatut naatsorsuutigineqartorpiat ukiuni ataasiakkaani immikkoortinneqarnerisigut.

Sanaartugassanut iluarsagassanullu aningaasaateqarfiup 1.1.2000-mili pilersinneqarneranit 600 mio. kr.-it maanna uninngasuutigineqalersimapput. Tassuunakkullu ersersinneqarpoq **atuinissat piviusorsior tumik missingersuusiorneqarneq ajorsimasut!** Taamaassimagaluarpammi suliassat ilaat piffissaliussatut aalajangersakkamut sanilliullugu siuarsimanerusimassagaluarput, taamaalillunilu taakkununga tunngatillugu suliassanit kinguaattoorfiusunit aningaasaateqarfimmit taarsigassarsisoqartarsimassagaluarpoq, taamaaliornikkullu aningaasat ilanngaatisat ilanngaatigereerlugit sanaartugassanut iluarsagassanullu aningaasaateqarfimmi uninngasuutigineqartut ikilisinneqarsimassagaluarlutik.

- c. Attumi meeqqerivik pingaarnersiulluni tullerriaakkanit 20-iusunit Kangaatsiap Kommunianit nr. 20-itut inissinneqarsimavoq. Sanaartugaq ingerlanneqarmat pingaarnersiulluni tullerriaakkani 20-iusuni nr. 20-itut inississimallugu Kangaatsiap kommuniata paasissutissiissutigaa. Sanaartugarli ingerlanneqanngilaq. Akerlianilli sanaartorneq 2002/2003-mili uninngasimalluni!
- d. Aningaasat immikkoortitat atorneqarnissaat siunertaralugu suliassanik naleqqunnerusunik Naalakkersuisut allattoqarfiat nassaarsinnaanngimmat qinnuteqaat matumani pineqartoq pinngorpoq. Pilersaaruserioriaaseq taamaattoq tatiginnilersitinnigilaq. Sanaartugassaq pingaaruteqartutut isigineqarsimappat imm. b- ip ataani allassimasut eqqarsaatigalugit allannguutissatut siunnersuuteqarnermikkut sanaartugassaq matumani pineqartoq 2007-imi aningaasanut inatsisissatut siunnersuummut Naalakkersuisut ilanngussimasariaqaraluarpaat. Aningaasat aningaasanut inatsisikkut immikkoortinneqarsimasut Naalakkersuisut soorunami atortussaavaat, tamatumali peqatigisaanik aningaasat naapertuuttumik akisussaassuseqartumillu atorneqarnissaat taamatulli pingaaruteqartigaaq! Suliami matumani pineqartumi ersarippoq tulleriinnilersuigasuartoqaannarsimasoq, tamannalu tassaanngilluinnarpoq tulleriinnilersuineq! Suliassanik allanik pingaarnerusunik peqannginnera uppernarsisinneqanngilluinnarpoq.

Naallu ajornartorsiutit siuliani taakkartorneqaraluartut Aningaasaqarnermut Ataatsimiititaliami amerlanerussuteqartut, Siumumeersut, Inuit Ataqaatigiinneersut Atassummeersullu kissaatigaaq sanaartugassatut suliassaq taanna naammassineqassasoq. Taamaattumillu ataatsimiititaliami amerlanerussuteqartut suliaq akuersissutigisinnaallugu. Tamatuma peqatigisaanik taama akuersineq kommuninut allanut tuniluussinnaasutut amerlanerussuteqartunit isigineqanngitsoq ataatsimiititaliamit amerlanerussuteqartunit oqaatigineqassaaq. Taamaalillunilu Namminersornerullutik Oqartussat aningaasaleeqataanisamik siumoortumik neriorsuuteqarsimatinnagit sanaartugassatut suliassanik aallartitsisoqarsimatillugu nunatsinni kommunit aningaasat atorneqareerneranni aningaasaliissuteqarnissamik qinnuteqaatinik siunissami akuersissuteqarfigineqartarnissaat

naatsorsuutigineqarsinnaanngilluinnartoq amerlanerussuteqartunit ersarilluinnartumik erseqqissarneqassaaq.

Aningaasaqarnermut Ataatsimiititaliami ikinnerussuteqartoq, Demokraatit ilaasortaataat aningaasaliissuteqarnissamik qinnuteqaat pillugu ima oqaaseqarumavoq:

*”Landskarsip sanaartugassanut aningaasaliissutaasa pingaarnersiulluni tulleriiaariffigineqartarnissaasa aalajangiusimaneqarnissaa pingaaruteqartut Demokraatinit isigineqarpoq. Tulleriinnilersuigasuartoqaannarsimaneranut qinnuteqaat una ersersitsisuosorinarpoq, tassami sanaartugassat suliasamik ingerlanneqanngitsumik, tassungalu atatillugu aningaasartuutissat naatsorsuutigineqartut meeqqanut inuusuttunullu paaqqinniffinnut 2006-imi aningaasanut inatsimmi aningaasaliissutaasut iluaniissinnaasumik nassaarniarlutik Naalackersuisut kommuninut arlalinnut sianeqattaarsimasorinarmata. Landkarsip aningaasaataanik taama atuineq Demokraatinit toqqissisimanartinneqanngilaq.*

*Qinnuteqaammik matuminnga akuersissutiginninneq tuniluussinnaasutut aarleqqutigineqarsinnaasoq Demokraatit isumaqarput. Attumi paaqqinniffimmik sanaartorneq siumut aningaasaliissuteqartoqanngitsoq aallartinneqarpoq, taamaattumillu sanaartugassamut pisortat aningaasaliinissaat Aningaasaqarnermut Ataatsimiititaliamit 2003-mi itigartitsissutigineqarpoq (Aningaasaqarnermut Ataatsimiititaliap suliaa nr. 03/01.36.02.06-47). Attumi sanaartukkamut aningaasartuutissat sinnerisa 50 %-iinuinnaq aningaasaliissuteqarnissaq Naalackersuisut qinnutigigaluaaraat qinnuteqaammik akuersissutiginninnikkut Landskarsip sanaartugassamut kingusinnerusukkut tapiissuteqarnissaa neriutugalugu aningaasaleeqataanissamik siumoortumik neriorsuuteqartoqanngitsoq sanaartugassanik aallartitsinissamut kommunit ussarnartorsiulersinnaasut Demokraatit isumaqarput.*

*Tamanna tunngavigalugu qinnuteqaat Demokraatinit akuerineqarsinnaanngilaq.”*

### **Aningaasaqarnermut Ataatsimiititaliap aalajangiinera**

Siuliani oqaaseqaatit innersuussutigalugit Naalackersuisut inassuteqaataat Aningaasaqarnermut Ataatsimiititaliamit amerlanerussuteqartunit **akuersissutigineqarput**. Siuliani ikinnerussuteqarluni oqaaseqaatit naapertorlugit Naalackersuisut inassuteqaataat ikinnerussuteqartumit akuerineqarsinnaanngillat.

Inussiarnersumik inuulluaqqusillunga

Jens Lars Fleischer  
Siulittaasup tullia

